




O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

MATI 2015

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

O le Vaai Faale-Tala Lelei i le Faaliuefuefuina o Tino Maliu

Pepa mai le Mafutaga
Matagaluega Faleata - 16-17
Iulai 2014
saunia e

Muao Fagasua Sua

Faatomuaga:

O suiga e tutupu mai i lea
taimi ma lea taimi i totonu o lo
silasila itulau e 2

O LE ATA:

O le aso o Tu ma Aganuu -
Kolisi o Leulumoega Fou -
2009

O le Mafuaaga o le Pese:
**God Will Take Care of
You**

faaauau itulau e 11

**Sau e Vaai iai?
Come and See!**

silasila itulau e 12

**O Papeloniamai
Anamua ma ona po nei**

silasila itulau e 7



O le Vaai Faale-Tala Lelei i le Faaliuefuefuina o Tino Malii

mai le itulau muamua

tatou siosiomaga ma si o tatou atunuu, e tulai mai ai lagona eseese ma tuufesili ai le tele o tagata pe alaga tatau pe leai. Mo se faata'ita'iga, o tino malilii o tagata Samoa i aso anamua, sa na ona 'aui i siapo poo toga ona tanumia loa lea i se taimi vave. Peitai, ua iai nisi o faiga e mafua ona o suiga o le soifuaga o loo tatou ola ai. Ua tele ina tanu tagata i pusa maliu taugata, ma ua talia lautele foi le tui o tino malilii i vilaaau pe tuu i pusa aisa mo se taimi umi e oo atu lava i le masina a o le'i tanuina.

O lea foi ua faaulufale mai le isi suiga fou i totonu o si o tatou atunuu e ala i le faatuina o se nofoaga, e faaliuefuefuina ai tino o tagata malilii, ae ua lagalaga ai foi lagona ma tuu fesilisili le toatele pe alaga tatau leni faiga pe a fua i le aganuu, aemaise o le talitonuga faa-Kerisiano.

(E fou le fale ua faaliuefuefuina ai tagata malilii i Samoa, ae ua leva ona faatino e tagata Samoa i fafo lea faiga).

O le 'auga la ma le faamoemoe o leni pepa, o le taumafai e suesue le Tusi Paia, ma aumai ni mau e faatatau i leni mataupu, ma taumafai e fai se faaiuga, e tali ai fesili i le tatau ma le le tatau o lea faiga i totonu o si o tatou atunuu, aemaise o le Ekalesia.

O le a le faaliuefuefuina o tino malii?

O le faaliuefuefuina o tino malii, o se faiga e tuuina ai le tino malii i totonu o se pusa laupapa, ona tuu lea i le ogaumu e susunuina ai mo ni nai itula i le vevela pe tusa o le 1000 tikeri C., seia oo ina liu efuefu. O se faiga ua leva ona faatinoina e tagata Eleni ma tagata Roma i aso a o le'i afio mai le Alii o Iesu Keriso i le lalolagi.

Ae na mafua nei faiga ona o taua

ma fevaevae'iga i le va o tagata Eleni ma isi malo o le lalolagi. A oo ina malilii se vaega toatele o fitafita tau a Eleni i atunuu ese, e faigata ona faafoi tino malilii o ia fitafita i o latou aiga ma nuu mo falelauasiga masani, o lea na afua ai ona susunuina pe faaliuefuefuina ia tino malilii ae ave o latou lefulefu i o latou aiga mo isi sauniga e tusa ma a latou tu ma aganuu.

E ui lava o le tanumia o tino malilii i le eleele o se tu masani a tagata Eleni, ae sa suia foi lagona o tagata ma talia aloa'ia ai le susunuina o fitafita, ma ua pei ai o se aga faaloalo e faapitoa lava mo tagata totoa ua ofoina lo latou soifua mo lo latou atunuu. Mulimuli ane ua faatinoina foi e Roma lea faiga i le agaga lava lea e tasi.

Peitai, ina ua amata ona tuputupu le Ekalesia Kerisiano ma ua avea le faa-Kerisiano ma Ekalesia aloa'ia a le malo o Roma, ona taofia loa lea o ia faiga ae tatanu tino malilii ona o le talitonuga, o le faaliuefuefuina o se tu ma se aga faapaupau.

Ae o le faaiuga o le senituri e 19 na matauina ai le toatele o tagata Europa ma Amerika ua latou toe fafaguina lea faiga ona o suiga tetele o le olaga ma le aafiaga o tagata i le tamaoiga o le lalolagi. Ua faaaogaina ai le eletise, o le kesi, ma suauu i totonu o ogaumu e faamu ai tino malilii aua o le faiga leni ua sili ona faigofie toe taugofie foi pe a faatusatusa i le tanuga.

O Mau a le Tusi Paia e Faatatau i le Faaliuefuefuina

Ua ou aumaia i leni pepa nisi o tusi sii mai le Feagaiga Tuai ma le Feagaiga Fou o loo ta'ua ai le tanuga ma le susunuina o tagata malilii e tata'i ai o tatou

mafaufauga ma fai ai sa tatou faaiuga mo leni mataupu ma'ale'ale.

Feagaiga Tuai:

Kenese 23:19: (Tanuga o Sara) "Ua mavae lea mea, ona tanumia lea e Aperaaamo o Sara lana ava i le ana oi le fanua o Makapelu, i luma o Mamere; o Heperona lea i le nuu o Kanana."

Kenese 25: (Tanuga o Aperaaamo) O le fanua sa faatauina e Aperaaamo i le fanauga a Heti. Na tanu i lea mea o Aperaaamo, ma lana ava o Sara."

Kenese 35:29: (Tanuga o Isaako). Ona to lea o le manava a Isaako, ua oti o ia, ma ua faatasi atu i lona nuu, ua toeaina, ua tuu tulu'i lona ola; na tanu foi o ia e Esau ma Iakopo ona atalii.

Kenese 50:13: (Tanuga o Iakopo). "Aua ua ave ia e ona atalii i le nuu o Kanana, ma latou tanumia o ia i le ana i le fanua o Makapelu, na faatauina mai e Aperaaamo, atoa ma le fanua, e fai ma tuugamau mai ia Eferona o le Sa Heti, o loo i luma o Mamere."

Iosua 24:32: (Tanuga o ivi o Iosefa). "O ivi foi o Iosefa na ava'e e le fanauga a Isaraelu mai Aikupito, ua latou tanua i Sekema i le fasi fanua na faatauina e Iakopo i atalii o Hamoro le tama o Sekema."

Teuteronomie 34:5-6: (Tanuga o Mose) "Ua oti foi Mose le auuina a le Alii i lea mea i le nuu o Moapi, e pei ona fetalai mai ai le Alii. Ua ia tanu foi ia te ia i le vanu i le nuu o Moapi, e faafeagai ma Petepeora; ae le iloa e se tagata lona tuugamau ua oo mai lava i le aso nei."

(E tele isi tagata o le nuu o le Atua o loo tanumia foi e tusa ma le mau *faaauau itulau e sosoo ai*

O LE LAUGA

Tusis Faitau: Kenese 21: 14 – 19
Matua: Faiupu 17

“Ua faafofoga foi e le Atua le leo o le tamâ, ona vala’au mai lea o le agelu a le Atua ia Akara mai le lagi, ua faapea mai ia te ia, Akara e, ua faapefea ea oe? Aua e te fefe, auâ ua faafofogaina e le Atua le leo o le tama i le mea o iai o ia.”

Manatu Autu: **“O LE TAGI A LE TAGATA VAIVAI”**

E mafai foi ona faapea: - *“O le tagi a le tagata ua leai se malosi. The cry of the powerless.*

Fai mai le muagagana a le atunuu. **“E le falala fua le niu.”**

E le gata i lena: “A o le tafeaga foi, e iloga ona asaga i le pa’umatû.”

O le tofa mamao oi tala atu o ia muagagana peiseai o loo faapea mai, **“E le valevalenoa mea e tutupu ma se isi o faamanuiaga, (poo faigata foi) o loo mulimuli mai.**

Ua tofusua i tatou ma se ituaso pouliuli, e tauivi to’atasi ai na o ia lava, o lona lava ita, ma lona lava tigâ, o lona lava fa’avauvau, ma lona lava fa’anoanoa.

O ituaso faapea, e masani ona faaloto-tele ai le tagata, ina na o ia lava lana tauiviga. O ituaso faigata ia o le soifuaga, auâ e agai

atu ina fa’amasua atoa ai e le tagata lona loto ia oo lava i le taele.

O ituaso faapea e masani ona faitau e le au maitau laulu, ina ia iloa ai poo ai Pai, a’o ai Seve, a’o ai Tui. E lei agai pogisa Aperaaamo ia Akara. Na afua ona ua oge tagata le manava o Sara le ava a Aperaaamo. O Akara o le fafine pologa, o le Aikupito. Sa mau faatasi ma Aperaaamo ma Sara.

E lei faia i se pouliuli poo se faamalosi, leai sa faia lava i se maliliegaautasi oletinâmaletamâ, Aumai le fafine pologa sei saili se suli o Aperaaamo. E ui e le o le

faacauau itulau e 4

O le Vaai Faale-Tala Lelei i le Faaliuefuefuina o Tino Maliu

a le Feagaiga Tuai, ae ua ou aumaia lava na o le auga tama ma isi tagata iloga o le nuu o e fai ma faaitaiga.).

mai le itulau e 2

Iosua 24:29-30 (Tanuga o Iosua)
Ua mavae ia mea, ona oti ai lea o Iosua le atalii o Nuno, le auauna a le Alii; o ona tausaga e tasi le selau ma le sefulu. 30 Ua latou tanumia o ia i le fanua o lona tofi i Timenatasera i le mauga o Efaraima, i le itu i matu o le mauga o Kaasa.”

1 Tupu 2:10 (Tanuga o Tavita).
“Ua taoto foi Tavita faatasi ma ona tama; ona tanumia lea o ia i le aai o Tavita.”

1 Samuelu 31:11-13 (Susunuina o Saulo ma le tanuga o ona ivi). “Ua faalogo e ua nnofo i Iapese-Kiliata i le mea ua faia e Filisitua ia Saulo; ona tulai lea o tagata totoa uma, ua savavali atu i latou, ua atoa le po; ua latou ave le tino o Saulo ma

tino o ona atalii nai le pa o Petesani, ona o atu lea o i latou i Iapese; ona latou susunuina ai lea o i latou. A ua ave o latou ivi, ma tanu ai i lalo o le laau tele i Iapese, ma latou anapopogi ai i aso e fitu.”

Amosa 6:8-10 (Faamasinoga a le Atua ia Isaraelu) “Ua tauto le Alii le Atua i lona soifua, o loo fetalai mai ai le Alii le Atua o ‘au, ua ou inoino i le mamalu o Iakopo, ua ou inoino foi i ona maota, o le mea lea ou te tuuina atu ai le aai atoa ma mea ua tumu ai. Afai foi e totoe tagata e toatinoagafulu i le fale e tasi, latou te oti ai lava. E siitia se tasi e le uso o lona tama, o le na te susunu foi ia te ia, e aumai ai ivi ai le fale.”

Feagaiga Fou

Mataio 14:12 (Tanuga o Ioane le Papatiso). “Ona o ane ai lea o ona soo, ua ave le tino, ua tanu ai; ua latou o mai foi, ma ta’u mai ia Iesu.”

Ioane 11:17 (Lasalo i le Tuugamau). “Ua oo atu Iesu, ona silafia lea ua aso fa o ia i le tuugamau.”

Luka 13: 52-53 (Tanuga o Iesu) “O ia lea ua alu atu ia Pilato, ma faanoi atu i le tino o Iesu. Ua na ave ifo ai, ona ‘aui lea i le ie lino, ona tuu ai lea i le tuugamau na foa i le papa, e lei tuu ai lava se tasi.”

Galuega 8:2 (Tanuga o Setefano)
“Ua ave foi Setefano e tanu e tagata ua matata’u i le Atua, ua matua taufai tagitu’i i latou ia te ia.”

AOTELEGA:

Mai faamaumauga a le Tusi Paia, ua manino lelei ai le auala aloaia e faia i tagata maliliu o le nuu o le Atua, o le tanumia i le eleele. Peitai, e mafai ona faapea nisi, o tu lava ia ma aga a tagata Isaraelu ae le o se faiga mo le lalolagi atoa aua e iai lava mea o loo faatonuina e le Atua ia Isaraelu lava na o ia, ae le o le faamoemoe mo le lalolagi atoa.

silasila itulau e 8

O LE LAUGA

mai le itulau e 3

finagalo lea, o le Atua ma le osiga feagaiga na fai ma le Atua.

“Ou te faia oe ma nuu tele, ou tefaamanuia foi ia teoe, outematuâ fa’amamaluina lou igoa, e manuia foi oe.”

Peitai, e le valevalenoa mea e tutupu ma se iu o fa’amanuiaga, ia poo ni faigata foi o loo mulimuli mai.

Ua sau le Atua i lona taimi, ua ia tatala le faitotoa o fa’amanuiaga ia Aperamo ma Sara. Ua fanau Sara ma ua faaigoa ia Isaako.

Lea ua i fale le matega, pe tua ma ni a le mafutaga ua fai nei. O Sara ma lana tama o Isaako, ma Akara le auauna fafine a Sara ma Isamaeli lana tama na fanau mai ia Aperamo.

Ioe, o le matau’ama le loto tiga ua tupu a’e i le loto o Sara, ae o le alofa ma le atuatuva le ua taoto nei i le ala ua savalia e Akara le fafine pologa ma si ana tama.

Aua nei galo soo se filifiliga e faia e aunoa ma le Atua, e le asa lava ma ni faafitauli. “E ui ina tetele ta’iga, e iloga lava ona asagai le pa’u matu.”

Le tupua mate gata sa i le loto o Aperamo, ao lea ua fotufotua’i mai ai tiga ma faigata i le loto o Akara ma si ana tama o Isamaeli.

O le tama e le faapito lona alofa peitai e tatau lava ona faasino ala a le finagalo o le Atua.

O loo i le mataupu e 16 o le tusi lava lenei a Kenese le feiloaiga a Akara ma le agelu a le Atua. Ina ua tuliese e Sara le toalua o Aperamo ia Akara le fafine pologa, a o ia tauave Isamaeli i lona manava.

“Ia e foi atu i lou matai, ma e faamaualalo atu ia te ia. Ou te matua faatoateleina lau fanau. Faauta ua e to o le a e fanaua mai se tama tane e te faaigoa foi ia te ia o Isamaeli auâ ua faafogaina e le Atua lou tagi” (Kenese 16: 9–11.)

O loo i le mataupu e 17 o le tusi o Kenese le feosiosaiga a le Atua ma Aperamo. O upu mulimuli o lenei feagaiga toe faamanatu e faapea.

“E moni lava e fanau mai sou atalii ia Sara lau avâ, e te faaigoa foi ia te ia o Isaako, ou te faatumau foi la ma feagaiga ma ia atoa ma ana fanau... o le feagaiga e faavavau. I le ma Isamaeli foi faauta ua ou faamanuia ia te ia ou te faauluola ia te ia. Ae peitai, o la’u feagagia ou te faatumauina lea ia Isaako.” (Kenese 17: 18-21).

Le toe faamanatu lea ia Aperamo na suia ai le igoa Aperamo ia Aperamo, o Sarai ia Sara.

I le tusi faitau, e lei faigofie ia Aperamo le mea ua tulai mai. E ui inamusulona loto, augata foi lona mafaufau e tuulafoai ma tuli ese le fafine pologa faatasi ma lona atalii ua auau i ai lona loto.

Ae o lea lava ua tautino le solo a le tamaloa. “Fetalai le Atua, “Aperamo, ia fai le mea o loo loto i ai Sara, ia tuli ese Akara ma lana tama.”

E taua le faatalitali i le Atua, aemaise ai, a lotolotoi le Atua i soo se faaiuga tatou te fai, e manuia ma sologa lelei.

O le mau a le Tusi Paia: “E sili le e pulea lona loto, nai lo le na te ae’a le olo. E sili foi le usitai nai lo le ga’o o le mamoe.

Fetali le Atua, - Aperamo, aua e te tiga ona o le tama, atoa ma lou fafine pologa, o mea uma ua fai atu ai Sara, ia e usitai i ai.

Talofa, e ui ua feuluulutai le alofa, aemaise lava i le va o matua ma fanau, ae sili lava le usitai i le Atua. Ole upu moni, eleosemanuia mai fafo, o le manuia lava mai fale. O le afuaga foi ona o se maliliega na faia ae galo ai ona fesili i le Atua. O le upu moni e le valevalenoa mea e tutupu ma se mulimuli mai.

Ua tuua e Akara ma Isamaeli le aiga ma loimata. Fa’i o Aperamo a o Akara foi ia ma si ana tama. O loimata o le alofa ua nutimomoia. O loimata o le popolevale ma le atuatuva le peatua ma ni a le malaga ua tapena nei.

O le malaga fesea’i i le vao o Peresepa. Ua uma foi meaa i ma le faguvai. O le ata manino ua leai se faamoemoe, ua galala i le fia aai ma le fia feinu. Ua naumati vaieli ma vaitafe o Peresepa. Ua oge foi le laueleele, o le ata o le ola ua goto ifo ma le faamoemoe ua muta.

Ua tata vale le fatu, ua popole ma atuatuva le loto. Ua fai nei le tauiviga o le loto ma mafatiaga, ina ua tagi leo tele le tama o Isamaeli.

Ua augata taliga e faalogo i le tagi, ua musu foi lima e sapai lana tama, ua moeiini foi mata, ua musu e vaai atu ua mou atu le malosi ma le ola, e legata o Isamaeli o le tina foi ia.

Ua faamatalaina loimata o Akara o loimata oletuulafoaina, -loimata oleleamanaiaina, -loimataualafaoi lona tiute faatina ma lona tiute faatausi fanau.

Ua pogisa lona mafaufau, auâ ua oona ma inu gata le ipu o tigâ ma mafatiaga ua taoto mai nei i ona luma.

O le tagi ma loimata o Isamaeli ua faamatalaina o loimata – o le tuulafoaiina ma le faagaloina se iuleo ua faasolo ina vaivai ma leai se malosi, - o le alaga a le tagata leaga ua galala mo se amiotonu e ola ai, oletagata uanaunau atu lona loto i ni aao alofa sei mapu atu i ai ma aumaia le mafanafana, - e valaau i le Atua e alofa mai ma laveai mai.

O le fesili: O ai ea e utumalie ai nei loimata ua to faaua mai? Ao ai e mafaia ona toe faafoi mai se loto ua nutimomoia ma se fatu ua ta’e ona o le alofa.

faaauau itulau e 16

MATINI LUTERU

1483 - 1546

O le Auupega o le Toe Fuata'i

Na iai lava le talitonuga o Matini Luteru o le toe fuata'iga o le pulega a le pope, o le a faafaigofie ai ona liliu mai tagata Iutaia i le Ekalesia Kerisiano. Na amata lana taumafaiga i lona tau liliuina lea o a'oa'o o le lotu Iutaia. Peitai na avefa lea ma ala ua taumafai ai a'oa'o e liliuina Matini i talitonuga maumaututu o loo iai le pulega faale-pope. Ua mautala foi Matini ua toatele nisi ua liliu i talitonuga ia o le pope. Ona muta ai loa lea o lona fiafia e faia lea mea, a ua tupu a'e ia te ia se manatu e tataua ona la'u uma tagata Iutaia i Palesitina. Fai mai Luteru o a latou faauigaga o tusitusiga pa'ia o ni lapisi.

Na tuua'i e Matini tagata Iutaia i lo latou fasiotia o pepe a Kerisiano, faa'ona vai'eli, ma lo latou toe fasiotia lea o Keriso e ala ia latou mea o fai i le faiga o le faamanatuga. Na oo ina 'apoina e Matini le talitonuga faale-pope e faapea o tagata Iutaia o maile ma ia faapea ane ai i taimi ua vaivai o le a oti, "Ua sese tatou i lo tatou le fasiotia uma o latou."

O Luteru o se Nazi?

E ui lava fai mai Matini o ona manatu e faale-faatuatua, peitai ua lauiloa nei o ia o se tagata faailoga lanu ma tetee i tagata Iutaia. E oo lava ia Hitila (Adolf Hitler) na ia faaaoga nisi o talitonuga o Matini ma ia ta'ua Matini "o se Siamani auliuli e inoino i tagata lanu e le mai atunuu papa'e o Europa.

Ou te talitonu e sese Matini e uiga i ona manatu e uiga i tagata Iutaia. Ua lapata'iina tatou e Paulo i lana tusi mo tagata Roma ina ia tatou manatua o tatou o tagata ese o le faatuatua, o se lala na totoina atu i le pogai poo le a'a o Iutaia. O talitonuga mamafa o Matini e

sese, peitai e le faavaeina i luga o lanu o tagata. Na ia inoino i tagata Iutaia ona o lo latou le talia lea o le faaaliga o le Atua ia Iesu.

E matua le taliaina lea uiga inoino o Matini, peitai ou te fia faaaliga le eseese lenei. O le talitonuga o loo finau mai e faapea o tagata Iutaia e le taitai ona tutusa ma tagata papa'e, o se talitonuga na faaaoga e Hitila, ma e faato'a mapunaa'e i le senituri e 19. O faauigaga sese na tosoina atu ai ma le igoa o Matini ma ona talitonuga, na faia ina ia mafai ai ona fai o faiga faa-Holocaust, lea na fasiotia ai le tusa o le ono miliona tagata Iutaia mai atunuu e tele o Europa i aso o le Tauga Tele Lonalua a le lalolagi (1939-1945), ae le o le mea moni lea na talitonu iai Matini.

Soo se tagatga su'esu'e i le soifua o Matini o le a mafai ona ia maua mai ana saunoaga e tele e uiga i tagata Iutaia, sa popole o ia i o latou talitonuga faaleagaga, ae le o latou lanu. O le faaa'oa'oga, a fesiligia e se isi e uiga i lea mataupu faapea ua ia sauaina tagata Iutaia, e le'i tali Matini i luga o lanu o tagata, ae tali: "O le a sou manatu ia Keriso?" Na sau a 'ea o ia i lona ta'u o tagata Iutaia o le tupulaga faitaaga, o fanau a gata ma fanau a le tevelo?"

O Luteru o le tagata e tetee i le Pope, pei lava foi ina fiu o ia i uiga o tagata Iutaia. E ui lava sa nofo o ia i lona itumalo, ae sa ola e pei o se pagota. Aua ua faamaonia e le lotu ona moliaga o le tetee i aoaoga a le lotu, ma ua faaeteete ai lava o ia i lona soona tuua o lona itumalo. Ua fai lea ma mea e le maua ai ni ana auupega e fetai'a'i ai ma e tetee mai, vagana ai lana peni fulumoa ma lana vaiusi. O lea na ia tusitusi

ai ni ona manatu 'ina'ina ma upu faifai i le pulega a le pope. Ma o ia tusitusiga sa faasalalauina i le lalolagi atoa. Na gatete ona fili i le malolosi o ana tusitusiga, ae fiafia i latou sa mulimuli ma talitonu ia Luteru pe a fai mai Luteru, "Tatou tapu'e ia latou, le pope, o katinale, ma soo se isi e au i le Tagata ifo i tupua o le Pope Pa'ia - tase'i o latou laulaufaiva mai o latou gutu ma tu'itu'i i laau o faasalaga. Sa tusi foi ata taufaifai/taufaa'ata (cartoons), ona e sili atu ona malosi uiga faaaliga o ia ata i lo upu. Ona o le manatu o Luteru o le pope o le anitikeriso, o lea na ia manatu ai e fetai'i lava iai gagana le mafaufau.

Na matua tetee lava Luteru i se isi e faasaga tau mai i ona talitonuga faa-toefuata'iga.

Sa ia faitioina ona fili Katoliko ma faapea ane, "Ua faafia ona ou tagi atu ia outou o tagata o le pope e faitau mai Afioga a le Atua? Faitau mai Afioga a le Atua! Faitau mai Afioga a le Atua!"

'A 'o 'e le'i faitioina Luteru ma e faapea ane e sau tele o ia ma soona fai ona manatu, ia e manatua o Luteru na o ia lava lana itu, sa faasaga tau atu i le taitai o le lotu pogisa pi'opi'o ma fai togafiti leaga. O uiga ia o le lotu ua fia senituri o iai lava, ma e mana'omia ai se tagata faavevesi na te luluina. Na tuuina atu atoa e Luteru lona ola mo le toe fuata'iga o le lotu mo le lalolagi. O le a se mea o e tuuina atu iai lou ola?

O Ona Toe Aso

E le taumate o Luteru o le tagata Siamani aupito logologoa lea ua soifua mai i le lalolagi. E ui lava sa gasegase i le tele o tausaga mulimuli ane o lona soifua, ae le'i tuua ai lava lona taumafai mo le toe fuata'iga. Na ia amata se tetee ma se faafouina tele, peitai, o le galuega o lea ua faato'a amata. O lona soifua na tumu i le tele o taunuuga manuia, tusa lava pe le o

faaauau itulau e 6.

MATINI LUTERU

1483 - 1546

O le Auupega o le Toe Fuata'i

maua sona malosi. Tusa lava pe o le a sa na faalogona, ae le tuuina ai lava lana lauga. E iai le taimi na ia fai ai lauga e 195 i totonu o aso e 145. A le lauga, ua tusitusi ma fai ana tama'i tusi. E le muta le faia pea lava pea o ana galuega, pe malosi pe leai.

E ui lava foi sa sauaina o ia, ae le tuua ai lava ona uiga malie, o se faailoga lea o se aposetolo ua matua ona uiga. Ae sa iai foi ona faafitauli. E fiafia, fai tala malie, i taimi o faanoanoa ai ma le mautonu tagata o latou faatasi. O lona olaga na papa'i atu i le lalolagi, ma o mea e tataua ona toatele nisi i Egelani latou te faia, na fai toatasi lava e Luteru, mo Europa, ma oo ai lava ina oo atu i le lalolagi atoa. E tele mea na ia luluina ai le atunuu ma le malo o Siamani o le a tumau pea mo tausaga e tele o lumana'i. Na ia ta'ua o ia o le perofeta Siamani, o se igoa na ia faia e faalili ai le pope. O lana faaliliuga o le Tusi Paia i le Gagana Saimani, ua avea lea ma ta'iala o le Gagana tautala Siamani i nei ona po. O lona olaga, na aafia ai le olaga o aiga uma o Siamani.

Na aafia le lotu i le lalolagi atoa i talitonuga o Luteru. Na sosolo atu le Lotu Luteru i le tele o atunuu o Europa, ma le Iunaite Setete o Amerika e oo mai lava i le aso. E oo lava foi i le Ekalesia Katoliko, o le tele o a latou suiga faa-toefuata'iga, na mafua mai ia Luteru.

Na ia suia foliga o le Ekalesia i le lalolagi atoa. E le'i fiafia o ia i le ta'u o le Atua, o le Atua Eleni. O lona Atua e Eperu. O lona Atua o le Atua na auaina iai Mose. O lona Atua e afio i ao o afa, e afio i apa'au o matagi, o lona Atua e gatete ai le lalolagi, O lona Atua e silisiliese, e mata'utia. O lona

Atua ua mafua ai ona ia loto tele. E ui lava na tetemu o ia i se fanua, ma fefe i faititili ma uila, fefe i le Atua na te le'i malamalama lelei iai, a o lenei ua tumu o ia i le ava, ma le ofo, ma le alofa. O le malosi faaleagaga, faapea lona lotonuu, na ia talia ai le galuega ua ofo mai, o le luluina lea o le Ekalesia Kerisiano i le lalolagi atoa.

O toe aso o lona soifua na aliali ai ia te ia se loto toa e pei ona aliali mai i ulua'i tausaga o le taumafaiga o le toe fuata'iga.

O le aso 23 Ianuari 1546, na malaga ai Luteru e faalelei se feeseesea'iga i le va o ni aloalii ma o latou tagata. E malaga a o loo matua ma'i lava, ma sa fai ai ma malolo le malaga. E taunuu ua matua tigaina lava lona ma'i. Ae ui lava i lea, e faafa ona lauga, faalua ona ta'ita'i i le sauniga o le Faamanatuga, ma ia faapa'ia ni faifeau se to'alua. Na fai ai lana tala e uiga i lana malaga e faapea, "A mafai ona ou faaleleia ia aloalii ma o latou tagata, o le a ou fo'i fiafia i lo'u aiga, ma ou ta'oto ai i le tuugamau."

O le aso 17 o Fepuari na faatetele ai le ma'i o Luteru. Na oo atu se foma'i e fesoasoani ma ia folafola atu se vaifofo. Ae le fia faalogo iai Luteru. Ua tele tausaga o manatu Luteru ua lata o ia i le oti, ona o ma'i o le tino o feagai ma ia. E iai se taimi na tusi ai ia Katie, ma tausua, "Ua ou fiu i lenei lalolagi, ma ua fiu foi le lalolagi ia te au."

O le po o le aso 17 o Fepuari, na tatalo faalausosoo ai Luteru, ma talanoa e uiga i le ola e faavavau i e sa faatasi ma ia. I se taimi mulimuli ane i lea po, a o ia faalogoina se tiga i lona fatafata, na ia tatalo ai, "Ou te 'ai'oi atu ia te oe, lo'u Alii Iesu Keriso, talia

mai lo'u agaga.. Le Tama e i le lagi, e ui lava ina aveeseina a'u mai lenei ola, ou te nofo pea ma oe e faavavau."

O le va o le itula e lua ma le tolu i le vaveao o le aso 18 Fepuari 1546, na moeini ai Luteru ma tuua lenei lalolagi ae faatasi atu i lona Alii. O lona tino na tuu i se pusa e fai i le pulu, ma lagomau i Uitenipeka i se sauniga matua mamalu lava ma le taualoa. O loo iai pea lona tino e pipii atu i le pulelaa o le falesa o Castle Church, lea na ia tu'imau ai i lona faitotoa ona talitonuga e Iva Sefulu ma le Lima.

Na avea mulimuli ane le falesa o Castle Church o se Westminster Abbey o le Ekalesia Luteru. O le tausaga e 1760 na mu ai faitotoa o le falesa i le taua lea e ta'ua o le Taua o Tausaga e Fitu. O le tausaga e 1812, na suia ai ia faitotoa i faitotoa apamemea, ma toe tusia ai foi ma mataupu lava nei e Iva Sefulu ma le Lima o talitonuga o Luteru.

O le Ekalesia ua Tupu Pea

I nei ona po tatou te aloa'ia Matini Luteru o se tasi o Tagata Toe Fuata'i aupito iloga na soifua mai i le lalolagi. Ae ui lava i lea, o mea mata'utia e tele na ia fai, o le tele o mea na fetia'i ai ma i latou sa latou fe'ese'esea'i, e itiiti uma ia mea i lo le malosi tele faaleagaga na ia maua i le faigofie ona malamalama i le Upu a le Atua. O le faaaliga o le Upu Tusitusia a le Atua na fanau mai ai le misiona a Luteru ma avea ma afi o le Toe Fuata'iga, na mu ai uiga fia tagata ma pi'opi'o o le Ekalesia, ma tula'i mai ai le agaga moni ma le faamaoni e tataua ona iai.

Mai le Upu, na mautinoa ai e Matini Luteru ua ia maua le faamagaloga e ala ia Iesu Keriso, ma ua avea ai o ia ma uo a le Atua. Na taula'i atoatoa le mafaufau o Luteru i le faamagaloga, ma e mai lea tulaga, na ia atia'e ai mataupu

faaauau itulau e sosoo ai

O Papelonia mai Anamua ma ona po nei

Na matua piasipao le maota o le tupu i le fiafia o tagata o tumu ai, aua na saunia e le tupu o Pelesara se 'aiga tele mo alii sili o lona malo. E selau ma selau moli o faasuauiina i u'u manogi, o loo malamalama ai le maota atoa. O nei moli o loo tautau mai i ni filifili auro. A o loo alala i le anoano o nofoa mananaia o le maota tama'ita'i lalelei o le malo. Matua pisa lava talanoaga, o nisi taimi e lagona atu lava nisi o faamatalaga e le logo lelei; e faasausili ma upu vale. Ae sili ai lava le leoleoa o le tupu o Pelesara.

Ua matua onana lava tagata o tumutumu ai i le maota, ae valaau le tupu ina ia aumai ipu pa'ia auro ma le siliva na latou ave faamalosi mai le malumalu i Ieruselema. Ua faatutumu nei ipu i le uaina, ma papa'i atu iai laugutu faapaupau o tagata na auai ma feinu i le uaina o iai. A o loo pepese tagata i viiga o o latou atua faapaupau e fai i le auro, siliva ma isi maa taua.

A o le mea na te'i ai ma muta le

fiafia o le tupu, ma tau pipii atu i le laulau, ona o se mea ua ia vaai atu iai i le puipui o le fale o loo tumutumu ai le aofia. Ua taula'i uma atu foi iai mata o i latou uma o iai i le fiafia. Ua vaavaai atu tagata i se lima o tusi i le puipui e faia i le alapasa, ni upu e matua manino lelei lava.

I le nofoa'iga atoa a Pelesara sa iai se taua i le va o Papelonia ma malo o Metai ma Peresia. Toe lava o Papelonia se aai tele o tu poupu e tetee atu i le osofa'i mai o 'autau manumalo a le tupu o Kuresa o Peresia. Ua lua tausaga o siosiomia Papelonia e 'au a Peresia. Ae ona o le malosi o le aai, ma le maua o ona pa, malolosi o ona 'olo, totoa o ona fitafita, ma le lava ma le faula'i o mea e tua iai e pei o taumafa ma le vai, na foliga mai ai e le mafai e 'au a Kuresa ona a'ea olo o Papelonia. E matua lava lelei taumafa ua saunia mo le aai e mafai ai ona oo atu i le 20 tausaga o siosiomia e se 'au tau ae le mafai

ona a'ea.

Ae na maua le togafiti e le tupu o Kuresa ina ua faalogo o le a fai se fiafia tele e alu le po atoa o fiafia ai tagata o le aai. O le po lea ua fuafuaina e Kuresa e osofa'i ai le aai o Papelonia.

O se tasi o mea aupito ta'uta'ua na faia e Nepukanesa, o le fausia lea o se vaituloto e faaputu ai le vai mai le vaitafe o le Eufirate, e tali ai mana'oga o le aai o Papelonia. E 52 maila faatafafa, ae 55 futu lona loloto. O le vaituloto lea na te fafagaina le aai o Papelonia. O le togafiti a Kuresa, o le momotuina lea o le tafe mai o le Eufirate i le vaituloto, ae faaoga le alia o le vaitafe e savavali mai ai ana fitafita ma oo atu i totonu o le aai.

O le la e onana tagata Papelonia i le fiafia, ae taunuu atu iai fitafita a Kuresa i le pogisa o le tuneva o le po, ma faaoo le fasi tele i tagata o le aai. Na auina i fafo mai le maota o le tupu se tagata e vaai poo le a le mea o piasipao ai fafo, ae te'i le tupu i le taunuu atu i totonu o le maota o le anoano o fitafita a le tupu o Kuresa o Peresia, ma latou faaoo le oti i le tupu o *faaauau itulau e 10*

MATINI LUTERU

1483 - 1546

O le Auupega o le Toe Fuata'i

malolosi sa fai ma ia faaalai. O ia mea na ia faaogaina e talepe ai le pogisa o loo iai, ma oo ai ina matala mai le malamalama mo oe ma a'u. Ona o lea malamalama ua mafai ai ona tatou iloa mai se sauniga lotu se tasi, mea sa oo atu i le fitu sefulu ma le lima tausaga i ona po o Tausaga Pogisa, faato'a malamalama ai le au faatuatua.

Sa talitonu Luteru o le mana tutumau o le Upu o le a tausia le Ekalesia ma ola ai pea ma manuia, ma taape ai mea tau faasese ma le

pi'opi'o, ma taunuu ai i le mea moni. O lana vaai mamao mo le Ekalesia e le'i muta ina ua maluu o ia.

Ou te faai'uina lena mataupu i le vaaiga mamao a Luteru mo le Ekalesia. Na ia iloa o lagi pogisa ua amata ona matala mai ma o le a faaauau pea ona matalatala a o taupati tagata e saili le mea moni e uiga i le Atua. Faia ia ana saunoaga ma vaa e momoli maia le faamalosi'au, aua, i nei aso, o outou lava o fua aliali o galuega a

Luteru i le lalolagi.

Fai mai a ia, "Ou te le o iloa atu se tulaga le manuia o le Ekalesia, na o se Ekalesia o le a ola pea ona o a'oa'oga mama ma le le pi'opi'o, ma tuputupu pea ona o galuega lelei a faifeau faamaoni mai lea aso i lea aso

Atia'e lou malosi faaleagaga. Ia e iloa le Upu a le Atua ma e tausi i le mea moni ua totoina lelei i lou loto, ina ia e fua mai ai fua e tele i lou atunuu, ma tatala ai pea lagi, ma aumai ai pea le toe fuata'iga i le senituri e luasefulu ma le tasi.

mai le tusi: "God's Generals", tusia e Roberts Liardon, faamatalaina e

Afemata T. Apelu Aiavao

Muamua e Sauni se Mea ta te Nonofo ai!

Talu mai lava le aso lea na ou oso ai ma faapa'u i le va o la'u uo o Maria e iva ona tusaga, ma le ta'ifau lapo'a fe'ai faafefe tagata i le mea matou te nonofo ai, e le'i toe tuu 'ese'eseina lava i ma'ua i lo ma olaga. Ua pei ma'ua o se masaga.

A o ma laiti, a timu ma te nonofo

i totonu o le fale ma fai ai a ma taaloga, pei o le mu ma le pele suipi. O isi aso e ma te teteu ai pei o ni teine lalelei o ata tifaga ma ma sisiva ma faata'ita'i ni ata.

Peitai o o ma moomooga faateineiti talavou e le'i taitai ona oo i le mea na tupu e mafai ona faatusa o se mea e faanoanoa ai faa-tagata

matua. Na amata i se aso o le tau malulu a o ma faasee i le mauga ua lilofia i le kiona i se paka tele o tafaoga o le aai. Ae te'i ua saoasaoa tele la'u mea faasee ma ua le mafai ona ou taofiofia, ma alu atu feto'ai tonu lava ma se laau tele. Na vaai mai iai Maria i lo'u lavea ma le tafetotoi o lo'u muaulu, ma faaaauai ai lava lana faasee ma lona manatu ua ou oti. Ina ua ou tausua iai ona o lana mea na fai pei e le'i manatu mai i lo'u lavea, ae tagi aueue ma fai mai, "Ou te le iloa poo le a la'u mea e fai pe ana e oti!"

Na toe tupu foi se isi mea tai

faaaauai itulau e 9

O le Vaai Faale-Tala Lelei i le Faaliuefuefuina o Tino Malii

mai le itulau e 3

(Ua fetalai mai foi le Atua ia Aperamo, A o oe, ia e tausi i la ta feagaiga, o oe, ma lau fanau, i a latou tupulaga, pe a mavae atu oe. O la tatou feagaiga lenei ma outou, atoa ma lau fanau, pe a mavae atu oe, tou te tausia; e peritomeina tane uma o ia te outou.) (Kenese 17:9-10). Ua manatu Paulo o faatonuga lava nei e na o le nuu lava o Isaraelu e faatatau iai, ae le o le lalolagi atoa aua o le Feagaiga Fou e moomia ai le peritomeina o le loto ae le o le tino).

Ma o le isi foi mea e ao ona silafia, e iai mea le lelei ma mea le sa'o o loo faatinoina e tagata o le Tusi Paia e le tatau ona tatou faata'ita'i iai. Mo se faata'ita'iga, na momoe Aperamo ma lana pologa o Akara a o loo fai lona toalua o Sara (Kenese 16:1-16), ma o le mulilua le mea lena. Na faiava Tavita i fafine e toafitu (1 Nofoaiga Tupu 3:1-7), o lona uiga o le mulilua faafitu. O le tupu o le nuu o le Atua o Solomona le atalii o

Tavita na faiava i fafine e 700 ma ana palake e 300, ma ua ou le iloa le ta'uga o lea faiga (1 Tupu 11:3).

E oo foi i nisi o tulafono i le Feagaiga Tuai, e matua'i le tala feagai ma feteena'i ma aoaoga a le Alii o Iesu. O ni faata'ita'iga laiti ia ua ou aumaia mo lou tou silafia. "O le na te fasi se tagata e oti ai o ia, ia fasiotia lava o ia. (Esoto 21:12). "O se fetuu foi i lona tama, poo lona tina, ia fasiotia lava o ia (Esoto 21:17) "O le puua foi, aua e magalua ona atigivae, ua tosiluaina lava, ae le toe 'ai e ia lana mama; e leaga ia ia te outou (Esoto 11:9)

O lona uiga, e foliga mai e faataga e le Feagaiga Tuai le fasioti tagata, ae faasa le 'ai puua, o mea e le talafeagai ma aoaoga a Iesu. O lona uiga, e le o mea uma e fai mai ai le Tusi Paia e tatau ona tatou mulimuli ai, ae tatau ona tatou faauiga lelei ma iloilo iai ma e fua i aoaoga a le Alii o Iesu Keriso, ona faato'a fai ai lea o sa tatou faaiuga.

O le mea la ua manino, e leai se tulafono poo se faatonuga a le Alii

o Iesu Keriso i le Tusi Paia e faasaina ai ona faaliuefuefuina se tino malii e ui ina manatu nisi o tu ia ma aga faapaupau. O lona uiga, o lenei mataupu i le faaliuefuefuina o tino malii o se mataupu e leai se sa'o ae leai foi se sese. Ua ou manatua ai le fesili a le aulotu i Korinito i le aposetolo o Paulo pe tatau ona 'ai tino o manu na osi ai taulaga i atua mamate pe leai. O le tali a Paulo e faapea, "O lenei, afai e tausuai lo'u uso ona o le mea e 'ai, ou te le toe 'ai lava i tino o manu e oo i le faavavau, ina ne'i tausuai ai lo'u uso ia te a'u." (1 Korinito 8:13). O lona uiga, a e iloa e afaina ai se faatuatua o se isi i lau mea lena o le a 'ai, ia e sili ona tuu, ae afai e le afaina ai se faatuatua o se isi, ia o le a la le mea e tuu ai. O lona uiga, e le sese e le sa'o foi le 'ai o aano o manu na osi ai taulaga i atua mamate, ae o le mataupu e fuafua i isi ou uso Kerisiano. O lona uiga, o le mataupu lenei i le faaliuefuefuina o tino malii e tatau ona fetuutuuna'i ai le mafaufau o le tagata ia pe fai pe le faia foi e fua i mea nei e pei o le aafiaga o isi tagata, o le tatou aganuu, o le nofoaga o fai ai le malii (fanua palagi), o le ala o le malii (mu pe

faaaauai itulau e 9

Muamua e Sauni se Mea ta te Nonofo ai!

faapea lava, ina ua ta'i fasefulu o ma tausaga. O se po malulu i le masina o Oketopa, na tatagi ai le telefoni ma faalavelave i le faiga o togiga mo la'u fanau e to'a fa mo le Halouini (Halloween). O Simi le to'alua o Maria lea na telefoni mai. Ua matua tete lava lona leo ma tau le mafai ai ona tautala mai. "Na matou o ma ave faanatinati Maria i le falema'i. Na te le o iloa se mea. E foliga faaletonu ona o le tuga o ona manu'a. E sili ona e faanatinati mai."

Oi tafefe i le fenumia'i o lo'u mafaufau, popole, le talitonu, tau pe lo'u fatu!

"E le oti Maria! E le'i ma'i lava i lona olaga atoa! Ma faamolemole le Atua e, na o le 42 ona tausaga. E le tatau ona oti se isi i le 42 tausaga! Ma le isi, o a'u lava e muamua i soo se mea e tupu mai i lo ma olaga!"

A o o'u alu atu i la'u taavale i le motouei, a ua faasolo faaata faasolo o se tifaga le tele o mea na tutupu i lo ma olaga: Pei o le taumafanafana a o le na o le ta'i

14 o ma tausaga, na ma talitonu ai e mafai ona ma fe'ausi i le isi itu o le vaiata loloto. Ae na lavea'i ma'ua e leoleo o le vaiata ma otegia ma'ua ma fai mai e tatau ona ma usita'ia tulafono o le vaiata, lea e fai mai e tatau ona e aau i le ogatotonu ma e toe fo'i mai ona faato'a e 'a'au ai lea i le isi itu.

Ona o a'u e matua o ma'ua, e masani ai lava ona ou muamua i soo se mea ma te faia. Ina ua uma la'u 'a'au i le vaiata'ele i le isi aso, ona ou fesoasoani ai lea ia Maria, ma faalototele iai a o 'a'au. "A'a malosi, 'a 'e faavaivai e le toe faatagaina oe e le leoleo o le vai e te ta'ele i le vai."

Ua latalata la'u taavale i le paka o taavale i le falema'i, ae o lea lava e ata faasolo mai mea na tutupu i lo ma olaga ma Maria - pei o a ma faigauo e le'i manuia; ma le aso na amata ai ona ou faigaluega a o a'oga lava Maria.

Faasolo atu ai ina filifili o ma ta'ito'alua, sosoo ai ma le maua o tamaiti; ma ou tagi ona e le fanau Maria. Ae na ave lea ma mea e matua alofa ai i la'u fanau. "E leai

se aso fanau e le sau ai Maria ma ni keke e faatau mai le faleloa." O tala ia a la'u fanau ua fiu fo'i i 'a'ai i a'u kuka. O mea ia sa tau faamafanafanaina lo'u mafaufau a o o'u faanatinati atu i le falema'i. Ae ina ua ou taunuu i le potu o iai Maria, na te'i lava o'u lagona i le mea na ou vaai iai. O lona faasasa'o mai e le gaioi, ma le mau faaga'au ma uaea o fetautaua'i solo ma tau atu i lona tino, na oso vave mai ai lava le popole ma le fefe. Fai mai ua pa se alatoto i totonu o lona fai'ai. Na o ni nai lauulu lava o aliali mai i le mau fusi o fusifusia ai lona ulu, e iloa ai o ia o se tama'ita'i.

Na ou tagi, "Maria e, o le a nei se mea a ou mafai ona fai e aunoa ma oe?!"

Na ou soso atu ma ou musumusu i lona taliga, upu e faalototele ai ia ma tau tatala ai le faitoto'a e tau atu i le mea ua ave o ia iai e le manu'a.

"Maria, taumafai mai. Maria, o a'u lea. Nofo mai ia i luga!"

Peitai, ina ua umi se taimi o o'u tagi lava ma tauanau Maria e nofo mai i luga, ae leai lava, ona ou manatu ai loa lea, o le taimi lenei, e le o a'u o le a muamua i lenei mea ua tupu, a o Maria. Ma a oo i le aso e finagalo ai le Atua ou te mulimuli atu ai ia Maria, ou te talitonu, o le a vevesi lava Maria e sauni se mea ou te nofo ai i le vaega mulimuli lenei o le ma malaga.

Tofa Maria! Tofa Maria!

O le Vaai Faale-Tala Lelei i le Faaliuefuefuina o Tino Maliu

malemo), tulafono faale-malo, ma le tamaoiga o le aiga.

Ua fetalai le Atua i le tusi a le perofeta o Isaia e faapea: "Aua o o'u manatu e le o outou manatu, o o'u ala e le o outou ala, ua fetalai mai ai le Alii. Aua e pei ona sili ona maua luga o le lagi i le lalolagi, ua faapea ona sili ona

maualuga o o'u ala i o outou ala, ma o'u manatu e sili i o outou manatu." (Isaia 55:8-9).

O lona uiga, e le mafai ona maua se sa'o ma se atoatoa i lenei pepa, peitai e faamoemoe lava a tatou taumafaiga i le Agaga o le Atua. Ua manino lava i tusi sii mai le Feagaiga Tuai le susunuina o tino

maliu o tagata ua faamalaia e le Atua, ma ua manatu ai foi nisi ua matua leaga lava lea faiga. Peitai o le tautau i le laau o se faasalaga mo se tagata ua faamalaia e le Atua i le manatu o tagata Eperu. A o le auala lea na aumai ai le faaolataga o le lalolagi e ala i le faasatauroina o lo tatou Alii o Iesu Keriso. O lona uiga, o auala na faapea e inosia e le Atua, a o faiga ia na auala mai ai le togiola mo oe ma au ma lenei mafutaga atoa.

O Papelonia mai Anamua ma ona po nei

mai le itulau e 7

Papelonia.

O Papelonia o le laumua lea o le nuu sa i le itu i saute o vaega sa ta'ua anamua o Mesopotamia. E i auvai o le vaitafe o le Eufirate e tusa ma le 50 maila i le itu i saute o le aai o Baghdad i ona po nei.

O le tele o le 'oa a lenei aai, ma lona malosi, toe tele, na manatu ai nisi i la aso, na o ni tala faafagogo nei tala e uiga ia Papelonia ae le o se atunuu moni. Peitai ina ua maua ona faavae ma toega o mea mai ia aso e tagata su'esu'e (archaeologists) o le senituri e 19, na iloa ai e moni lava tala o tusia i le Tusi Paia e uiga i lenei aai ma ona tupu. Ma e ofo ai lava le mafaufau e uiga i tala i lenei aai, aemaise lava pe a tatou faitau i le tusi o Isaia 13 o loo ta'u mai ai ni valoaga e uiga ia Papelonia e ofo ai lava le mafaufau.

O le uiga o le upu Papelonia, -Babylon) o le "Faitotoa o le Atua" - The Gate of God(s). Na avea lea ma laumua o laueleele sa ta'ua o Babylonia. O le upu Babylon o le faa-Eleni lea o le upu Eperu - Babel (Papelu). O le faamatalaga faagagana o le upu Babel i le Tusi Paia, o lona uiga o le fenumia'i - "confused" poo le fe'ese'esea'i. Ma, i tusitusiga uma i le Tusi Paia e uiga ia Papelonia, ua ta'ua ai o Papelonia o le faailoga lava lea o le fenumia'i ma feseesea'i o tagata ona o lo latou le talitonu i le Atua.

O loo ta'ua i le Tusi Paia e faapea o lotu poo tapuaiga faapaupau uma e faapogai uma mai lava i Papelonia. O loo faamauina foi i le Kenese 10: 10 e faapea ina ua mavae le lolo i le taimi o Noa, sa tasi lava le gagana, ma e na fauina e le tagata e igoa ia Nimarota se aai, ma faavae ai se tapuaiga, lotu.

O Nimarota o se tasi e tupuga mai ia Hamo le atalii o Noa - Kenese 11: 1-9.

O le tele o mea o tutupu nei i le lalolagi, o loo faaogatotonu i atunuu o Irak (lona laumua o Baghdad) ma Suria, lea ua faoa e tagata faatupu faalavelave ni vaega tetele o ia atunuu, ma faatuina ai le malo fou o tagata Moselemu faatu'iese ma faaigoaina o le Caliphate. Lea o loo faaali mai pea lava pea i televise sauaga ua faaooina i tagata Kerisiano ona o talitonuga faalotu Moselemu o ia tagata. Ua luluina le lalolagi ia latou mea o fai. Ua vevesi ai le lalolagi. Lea ua ofoina atu ai foi e Niu Sila nisi o ana fitafita e fesoasoani i fitafita a isi malo e tetele atu i ia tagata. Tasi le tatou mea e mafai ona fai, o lo tatou tatalo lea mo o tatou uso a Kerisiano o loo matua mafatia i sauaga i lea vaega o le lalolagi.

O le Mafuaaga o le Pese: God Will Take Care of You

E tasi le tausaga talu ona ma faaipoipo ae fai mai lo'u toalua ia au, pei lava ua ma'i. O ia tausaga e le'i iai ni su'esu'ega e mafai ona iloa tino ai poo ua to mo'i le fafine pe leai. E tele lava ni vaiaso e te'a talu ona to le fafine faato'a mafai e le foma'i ona faamaonia le tulaga ua iai. Ua ou le manatua pe aisea na ma le o ai ma Katerina, o lo'u toalua lea, e vaai le foma'i pe ua maua i'uga o su'esu'ega pe ua ma'i mo'i lo'u toalua. Na o a'u na ou alu e vaai se tali o su'esu'ega. Na ma fetau ma le tausima'i na faia su'esu'ega, ona fai mai lea ia au, ua ma'i Katerina, ma o le a fai ma'ua ma tama ma tina fou.

E ui lava ua ova lo'u fiafia i lea faaaliga, ae sa ou matua popole foi. Ona e leai sa'u galuega. E leai sa'u inisiua faale-soifua maloloina. Ou te le iloa pe o le a faapefea nei ona ou tausia lo'u aiga fou. Na ma tau

saili se aulotu ma te galulue ai, ae le'i taliaina ma'ua i aulotu na ma talosaga iai. A faapefea nei ona ma ola?

Na ou tago atu ua ki la'u leitio, ae te'i ua sau ai le pese ma ona upu nei,

*Be not dismayed whate'er betide,
God will take care of you! Beneath
His wings of love abide, God will
take care of you!*

*God will take care of you,
Through every day o'er all the
way; He will take care of you; God
will take care of you!*

Na tusia e Civilla Martin le pese lenei i le amataga o le senituri e 20 (faapea foi ma upu o le pese "The Blood Will Never Lose Its Power" ma "His Eye Is on the Sparrow"). E fa tausaga ae ou te le'i fanau ae maliu o ia. A o le pese na ia tusia ua ola pea e fai ma mea e faato'a filemuina lo'u loto i lea aso o le

tau e totogo a'e ai mea i le 1977. Na ou faalogologo i upu o le pese o ta mai i le leitio ona ou to'a filemu ai lea ma ou manatu, leai, o le a sologa lelei mea uma. E leai se mea e sili ona fesoasoani mai ia i tatou i lo pese ma viiga, ona e iai lagona ia i tatou faato'a tali atu i le Atua Silisiliese pe a faalogo i viiga ma o latou upu. Pei ona fai mai le Salamo 92: 1-4:

"E lelei ona vivii atu i le Alii, ma ia fai pesega i lou suafa le Silisiliese e; ia ta'u atu i le taeao lou alofa, ia ta'u atu foi i le po lou faamaoni, i le laaupese e sefulu ona manoa, ma le napeli, ma le leo o le kitara. Aua ua e faafiafia mai ia te au i lau galuega, le Alii e; ou te alaga fiafia ona o mea ua faia e ou aao."

E pito atu i le Tusi Paia le taua ma le aoga o viiga lelei, o se vaipuna e matua tumu i le 'oa mo le faapa'iaina ma le faalototeleina o Kerisiano i lo latou ola i aso uma. Fai mai Paulo i le tusi o le Kolose 3:16: "Ia nofo le afioga a Keriso i

O le Mafuaaga o le Pese: God Will Take Care of You

totonu ia te outou ia tele lava, a o outou a'oa'o ma apoapoa'i le tasi i le tasi i le potou uma lava, a o outou pepese foi i salamo, ma pese ma siva faaleagaga, ma le faafetai i le Atua i o outou loto."

Ou te talitonu o le talafaasolopito o le Ekalesia ua faamauina lea i ana pese ma viiga, ma le tala o le Ekalesia Kerisiano ua tusia lea i upu ma lagona o ana pese. E faaopoopo mai foi e lea auga tupulaga ma lea auga tupulaga o le Ekalesia Kerisiano, a latou pese ua faamauina ai o latou lagona, i o

O LE LAUGA

mai le itulau e 4

Na galo ia Akara e i ai le Atua i soo se mea. E faafogaina foi e le Atua le iuleo o le puapuaga ma tiga mai ona tagata. E leai foi se mea e faigata i le Atua. E tutusa foi i le Atua tagata uma.

Peitai, i totonu o le matuitui o tiga ma faigata na feagai ma Akara, na toe totogo ae ai se isi moemoe fou o lona faamoemoe, ina ua faalogo i le siufogoga o le Atua.

Le Atua na fetalai ia te ia ao iai i le vaipuna i le alai Sura, ina ua sola ese mai ia Sara. Le Atua lava lea ua toe fetalai foi ia te ia i le vao o Peresepa.

"Akara e, ua faapefea mai oe? Aua e te fefe, auâ ua faafogaina e le Atua le leo o le tama i le mea o iai oia. Inâ tulai ia, inâ tago i letama ma talitali a'e ia te i ou lima."

O aao o le alofa faatina. O lima o loo i ai le mafanafana faatina. O le sapai sei toe momoli atu i le tama le faamoemoe ua ola.

Ioe o le iuleo o le vaivai, ma le tagi a le tagata ua leai se malosi, e le gata e silasila mai i ai le Atua, ae faafogaina foi e le Atua.

O la Isaia: - "Na te avatua le malosi i e ua vaivai, a o e ua leai se

latou foi taimi o le talafaasolopito o le Ekalesia.

God Will Take Care of You

Be not dismayed, whate'er betide, God will take care of you;
Beneath His wings of love abide, God will take care of you;

Thro' days of toil, when heart doth fail, God will take care of you;
When dangers fierce your path assail, God will take care of you;

All you may need He will provide, God will take care of you;
Nothing you ask will be denied, God will take care of you;

No matter what may be the test, God will take care of you;
Lean, weary one, upon His breast, God will take care of you.

CHORUS:

God will take care of you. Thro' every day, o'er all the way,
He will take care of you, God will take care of you.

tusia e Robert J. Morgan

malosi, na te faatuputeleina i ai le malosi." (Isaia 40: 27)

Le au uso e, ma le Ekalesia pele, e le tau faailoaina le tele o iuleo i nei aso. O tiga ma mafatiaga o sauaga o loo feagai pea ma lo outou soifua ma so matou ola i aso uma.

Fai o totonu o aiga, o totonu o nuu, o Samoa ma le lalolagi atoa. A e a le Ekalesia ma le au faatuatua. Talofa o loo saili pea se to'omaga ma se mapusaga. O loimata o le mativa ma le le tagolima. O le tagi o le soifua sauaina ma le taotaomia o tinâ ma fanau. O iu leo o le mau faamai eseese e o' lava i fa'amai oti, o le fia aai ma le fia feinu, o taua ma misa, ua le utuva le toto masaa ma le soifua maumau.

Le Ekalesia pele, o oe o le ata o le Atua i ituaso faapenei. O ou aao e avatu ai le mafanafana i e o loo fia maua se fesoasoani.

O lou alofa fa'atama, fa'atina e utuailoimataoletagatauataotaomia le fa'amoemoe ola mai puapuaga ma mafatiaga.

O ou aao faaola e avatu ai se taeao fou i e o feagai pea ma fa'afitauliolesoifuga. Olau tatalo e fa'afogaina e le Atua ma utu

O se viiga ma se pese lelei, o loo tuu faatasi ai le tatalo ma le viiga, ma le mataupu silisili ua faaata manino mai ai ni mataupu ma le silisiliese o le Atua mo o tatou manaoga i aso fai soo.

malie ai loimata o le faavauvau ma letagia letagata ua vaivai maua leai foi se maloai.

E manatua i le loto le tagi a le pagota i le itu taumatau o Iesu. Le avanoa ua maua sei toe tatalo ma se avanoaeolaai. Levalaaualetagata ua leai se malosi ua vaivai foi le faamoemoe e toe maua mai se avanoa mai ia Iesu. Le iuleo ua lagona lesalamoma uatagiau'ueue i le Alii se avanoa e ola ai.

E moni lava e faafogaina e le Atua le tagi a le tagata vaivai ma le tagata ua lea se malosi. Fetalai tuu sao Iesu mai le Satauro, "O le aso ta te feiloai ai ma oe i le parataiso. "Ua faafogoga foi le Atua le leo o letama, ona valaau mai le oleagelu a le Atua ia Akara, ua faapefea mai. Aua e te fefe, auâ ua faafogaina e le Atua le leo o le tama i le mea o iai o ia.

"O le tagi a le tagata vaivai, The cry of the powerless.
Ona o Iesu, Amene.

Saunia: Rev Kelekolio Sanele FS
EFKS Salani Falealili.

O le Faamamafa a le Tusi Paia i Galuega Faa-Misionare

* O le feau muamua lava na aumai ina ua fanau Keriso, o le feau faa-misionare - Luka 2:10: Ona fai mai lea o le agelu ia te i latou: “Aua tou te matata’u; aua faauta, ou te aumai ia te outou le tala lelei o le olioli tele e oo mai i le nuu uma.”

* O le tatalo muamua na a’oa’o atu e Iesu, o le tatalo faa-misionare - Mataio 6:10: “Ia oo mai lou malo, ia faia lou finagalo, i le lalolagi e pei ona faia i le lagi.”

* O le soo muamua, o Anetele’a, na avea ma ulua’i misionare - Ioane 1: 41: “Ua ia uluai maua lona lava uso o Simona, ona fai atu

lea ia te ia, “Ua ma maua le Mesia,” (o lona uiga o le Keriso).

* O le feau muamua lava na faaali mai e le Alii Toetu, o le feau faa-misionare - Ioane 20: 17: Ua fetalai atu Iesu ia te ia, “Aua e te tago mai ia te au, aua ou te le’i alu a’e lava i lo’u Tama; a ia e alu i o’u uso, ma fai atu ia i latou, Ou te alu a’e i lo’u Tama ma lo outou Tama, o lo’u Atua ma lo outou Atua.”

* O le faatonuga muamua lava a le Alii Toetu, o le faatonuga faa-misionare - Ioane 20:21: Ona toe fetalai atu lea o Iesu ia te i latou:

“Ia outou manuia. Faapei ona auina mai o au e le Tama, e faapea foi ona ou auina atu outou.”

* O le uluai lauga faa-aposetolo o se lauga faa-misionare - Galuega 2: 17-39. (Su’e ma faitau iai).

* O le mafuaaga muamua lava na tuuina atu e le Alii e uiga i le alofa faa-kerisiano o le mafuaaga faa-misionare - “O le mea lea e iloa ai e tagata uma lava o o’u soo outou, pe afai ua outou fealofani.”

O mana’o mulimuli o lo tatou Faaola, o se mana’o faa-misionare - Mataio 28: 19: “O lenei, ia outou o atu e fai nuu uma lava ma soo, ma papatiso atu ia te i latou i le Suafa o le Tama, ma le Atalii, ma le Agaga Paia.”

O Oe o se Kerisiano?

“Ia outou faaa’oa’o mai ia te a’u, pei o a’u ia Keriso.” - 1 Kor.11:1

E faapefea ona e iloa le Kerisiano? Pe sili ona fai pea le fesili sa’o: ‘E faapefea ona atagia mai Keriso i lou tagata?’ A tatou taumafai e tali nei fesili, ma isi mau fesili e uiga i lenei mea ua fesiligia, ona tatau ai lea ona tatou sailiili ma va’ili’ili o tatou lava tagata ma o tatou olaga.

Afai e te ta’utino o oe o se Kerisiano, o oe la e matua tatau ona e taumafai e faailoa mai i ou uiga ma mea uma e te fai, ia Keriso; uiga o Keriso; foliga o Keriso Ina ua le toe ola oe, a o Keriso ua ola i totonu ia te oe. Afai ua ola Keriso i totonu ia te oe, ona suia ai lea o lou tagata, ua e amio e pei ona amio ma soifua Keriso.

E le mafai lava i sou poto faale-Tusi Paia ma ona mataupu silisili poo lou to’aga i le lotu, ma le faia o isi mea faalelotu e tele, ona suia le mea moni - ia e uiga mai, ma foliga mai, ma amio mai, ia Keriso. Poo le a lava le taua o galuega e tele tatou te faia, ae a le faia, ma faavae i le manatu ina ia viia ai Iesu

Keriso, e leai so latou aoga. Na o lou lava viiga o le a maua ai; poo le faamalieina o lou lava lotu, o le a maua ai.

O le tagata ua avea moni ma Kerisiano, e savali ma laalaa i faasitepu ua uma ona faataatia e le Kalatia 5: 22-26: “A o le fua o le Agaga o le alofa, o le olioli, o le filemu, o le onosa’i, o le mataalofa, o le agalelei, o le faamaoni, o le agamalu ma le amio mama; ----A o e ua ia Keriso, ua faasatauroina e i latou le tino, ma ona mana’o

ma ona tu’inanau. Afai ua tatou ola i le Agaga, ia tatou savavali foi i le Agaga. Aua ne’i avea i tatou ma e mitamita vale, aua ne’i felu’ia’i, aua ne’i felosia’i.”

O lou olaga atoa ia atagia mai ai le alofa, le faapalepale, ma le faamagalo ia Keriso, ina ia iloa ai e tagata o oe o le Kerisiano moni.

E tatau ona e onosa’i, ma malamalama, ma ola i se ola faamamaina.

A pupula mai i lou tagata uiga faa-Keriso, ona le mana’omia lea o se faamaoniga poo oe o se Kerisiano faamaoni pe leai.

Aua ua e le toe ola, a o Keriso ua ola i totonu ia te oe.

Sau e Vaai iai? Come and See!

Ioane 1: 46: Ua fai mai Natanielu ia te ia, “E mafai ea ona tupu o se mea lelei mai Nasareta?” Ua fai atu Filipino ia te ia, “Ina sau ia, ina matamata.” “Come and see!”

Ina ua masalosalo, pe ua fesiligia e Natanielu pe ono iai se mea lelei e tupu mai, pe maua mai i Nasareta, e puupuu lava ma

manino le tali a Filipino, “Ina sau ia, ina matamata!” Come and see! Sau e vaai iai!

O le fesili lava lea o fai e oo mai i ona po nei. Ae tumau pea foi le tali a Filipino - “Ina sau ia, ina matamata.” Come and see! Sau e vaai iai!

Sau iai e te matamata i le Tala Lelei ia Iesu Keriso na fofoa mai i puapuaga ma sauaga, a o lea lava e iai. Sau iai e te matamata i sulu
faaauau itulau e 15

O E UA MALILIU

Faimasasa Lemalama

16 Novema 1939-18 Aerila 2013

O le faletua o Faimasasa Leota Lemalama, o se tasi o faletua matua o le saofaiga a lenei aulotu EFKS i Otahuhu, Aukilani, Niu Sila. O se tina galue talu mai le tau amataina o le aulotu, ma le 1969 ina ua taunuu mai i Niu Sila, galulue ai loa ma lona alii le Afioga Leota Lemalama ma le fanau i Otahuhu.

O se tina tausaaafia i totonu o le aulotu ma le Mafutaga a Tina. E iloa gofie le nofoaga e alala ai Faimasasa i faiga mea a le aulotu, o loo talie mai, ona o se tagata fai mea malie, ma si ona siufofoga e leo lasi. O le loomatua to'aga i le lotu, e fautua lotu, e faapena foi le alofa i le faifeau ma lona toalua. E osi aiga, ma fai mea lelei, e pei ona molimauina e ona aiga, ma le aiga o lona alii. E le manao lava Sasa, e pa'u sa la'ua mea e fai a le lotu, faapea foi ana mea i le Mafutaga a Tina.

E iai ona itu malie: o Sasa, na ta'u mai e Leota ia te au:: 1) o le faiga taulaga a le aulotu, e amata a matou lafolafoga ia Aperila ma faasolo ailava i masinauma. Ae na molimau mai si ona alii, e mana'o lava le loomatua e amata le la taulaga i le tupe lapo'a, ina ia sili atu i le faifeau. O le faailoga o le tina fautua lelei, ma loto foai mo le galuega a le Atua. 2) O tausaga uma lava a o le'i oo i le 25 Tesema, e faamanatu atu ai e Sasa, se Faamanuiga o le Kerisimasi mo le faifeau ma le aiga. 3) O Leota o se tasi o teutupe leva a lenei aulotu. O le isi lea mea taua ia Sasa, o le faamanatu ia Leota, poo ua teu tupe a le aulotu, poo ua fai le tala o le tupe a le aulotu, poo lelei tupe a le aulotu. O se tina e

ola tapenapena ma sauniuni mo le lumanai. E taunuu mai lava Sasa ma Leota i le falesa, e lei taitai amataina le lotu.

O se tina e malosi, a o lona gasegase muamua lava lea, ua tigaina ai, ma valaau loa iai lona Matai ina ua 74 tausaga o lona soifua. O lona lotu faaleaiga ma ona toe sauniga, na faia uma lava i lana Ekalesia EFKS Otahuhu. Na ou taitaiina nei sauniga uma, ma le fesoasoani a le faifeau nofoaiga o Livigisitone Fiavaai, ma a'oa'o fesoasoani ia Ulufia Fetu, ma

Matila Kalati.

Jeremia 29:11-12: "Aua o a'u nei ua ou iloa manatu, ua ou manatu ai ia te outou, o manatu o le manuia, ae le o le malaia, o loo fetalai mai ai le Alii, e foaiina atu ia te outou, le iuga e iai le faamoemoe."

Faamaise pea le Atua i le tama, Leota Lemalama, le nofo a alo ma aiga uma, ma le aulotu. Manuia le malaga Faimasasa.

Ata Milo FS Otahuhu,
Aukilani, Niu Sila.

Lepou Siasau Pule Samasoni

8 Fepuari 1957-1 Iuni 2013

O le Afioga i le alii tiakono o Lepou Siasau, o se tasi o tama ua leva ona galulue fesoasoani ma lona faletua i le Ekalesia i Otahuhu, ma tautua le matafale o lo la'ua tina matua ia Eseta Safai. Ae ina ua faauuina lo la tofi tiakono ia Iuni 2011, ona galulue ai loa lea o le matafale tusia, ma fesoasoani i le matafale a lo la'ua tina matua. O se tiakono e fiafia i le tapuaiga, faapea foi ma a matou lotu au leoleo i le vaveao.

O Lepou o se tama laufofoga fiafia i taimi uma, tusa lava poo fafo atu o le lotoa o le galuega, e faatalofa lava Lepou, e tali mai lava i le mata 'ata'ata, e faigata ona iloa atu se taimi e mata ita ai, sa molimauina e le aulotu. Na molimauina foi lona lima foa'i, e le gata i le galue ai i le Ekalesia, a o tagata matutua o le aulotu latou te feiloa'i, e agalelei lava iai le tiakono, ma tuu iai sina meaalofa. E foliga o se tagata mau'oa, ae pau lava o lona lima foa'i. O se tagata tauivi i galuega mo le tausaga o lona

toalua ma le fanau, aemaise le osi aiga, ma le galuega a le Atua.

Na faauuina i lona tusi pasi o le Diploma in Theology i le a'oga Tusi Paia a le Agape College i Manukau i le masina o Me 2013, aevalaau iai lona Matai, ua manava ana feau i le masina o Iuni 2013.

Amuia se auauna o loo valaau mai lona Matai, a o loo faapena onafai. O lona sauniga faaleaiga ma lona toe sauniga, safaia lava i lona malumalu tapuai i le EFKS Otahuhu, sa ou taitaia, ma lauga i le toe sauniga, a o le aufaigaluega aoao fesoasoani ma le nofoaiga, na mau tofi i isi vaega o le tapuaiga.

Faamafanafanaina pea le tina ia Moli Fiapule ma le fanau, ona o le valaau a le Atua i le tama pele. Ia manuia le malaga Lepou.

Ata Milo FS EFKS Otahuhu,
Auckland NZ.

**Sleep:
If you have
trouble sleeping,
don't count
sheep. Talk with
the Shepherd.**

O E UA MALILIU

Lalau Osimoni Tauasi

14 Mati 1930-13 Aokuso 2013

O Lalau Osimoni Tauasi, e taunuu mai i le galuega ia Fepuari 2010, o se tasi o tama matua lava, a o loo maua pea le malosi e agai mai ai i le lotu i Aso Sa taitasi.

O le tama ia Lalau o se tiakono mai Salesatele, na tuua le mafutaga e le tina, ma faaauau ai lava lona tofi i Niu Sila. O le amataga lava o le 2013, na faavaatu'ia ai lona soifua matua, ma amata ai loa ona nofo fale, ae iai lava Aso Sa o faamanatuga, a malosi lava, ua susu mai i le lotu. A asiasi atu iai, o se toeaina talanoa ma tausua mai i ona taimi, faatusa i nei taimi ma le olaga, aemaise ai tala o lona nuu. E fiafia lava i tala i mea o tutupu, e le gata o Niu Sila a o Samoa fo'i,

aemaise foi le fesili mai i le galuega ma lana faamanuia.

O se tasi o ana mau ma te faasoa soo ai, "a maua lava le tapaa, ia ua atoa foi le aso". Aua o se toeaina e maliu nei lava o taumafa tapaa. O tala ia e faafetaui mai ai sa'u tala, pe a ou taumafai e faaleaoga le taumafa tapaa i le soifua o le tagata, aemaise ai se tagata ua matua e pei o ia. E toe tali mai, lafo maia lou finagalo, ae mautinoa e pule lava le tamaloa i le la o lona vaa.

Ou te fiafia i lana faafeiloa'i mai i se asiasiga i ni upu faa-toeaina matua o le atunuu, aua e lelei lona fofoga i le aganuu. O se tama agamalu ma tautua lotu. E fai lava ana mea faalelotu, fesoasoani, ina ua matua ma tau'ave e lona alo ua tiakono, ma le faletua lona matafale.

O le ma aso fanau muamua lea o se matua ua 80 tausaga le soifua,

ma sa matua faafetai lava le tama ia Lalau i le Atua, ona ua aulia nei tausaga e tele, a o se faafetai foi mo ma'ua, ua ma faia le aso soifua faapenei, o se tama ua matua le soifua.

O aufaigaluega a'oa'o fesoasoani o Matila Kalati na lauga i le lotu faaleaiga, talosaga o Ulufia Fetu, a o a'u na saunia upu faamafanafana i lona toe sauniga, ma ta'ita'ia ona sauniga uma.

Ua a'oa'o mai Iesu, (Ioane 16:22): "O lenei foi, ua maua nei outou i le faanoanoa, ae tatou te toe feiloai ma a'u, ona olioli ai lea o outou loto, e le aveeseina foi e se tasi lo outou olioli."

Ia faamafanafanaina pea le tiakono ia Tagitagiapu'a ma le faletua faapea le fanau, ona o le tuua o le malo e le tama pele. Manuia le malaga, feiloai i se aso.

Ata Milo FS, EFKS Otahuhu,
Auckland NZ.

Vaitimu Ruta Mulipola Pologa

12 Mati 1940-22 Me 2014

O le tina matua. Na soifua mai i le aso 12 Mati 1940 ae valaau iai lona Matai i le aso 22 Me 2014. O ona afio'aga o Salua i Manono ma Afega.

Na faaipoipo atu ia Mulipola Pologa i le aso 16 Fepuari 1959. Na tuumalo Mulipola Pologa i le aso 29 Iulai 1991, ae faaauau pea ona galue le tina e faaauau le tautua i le Ekalesia, o se tina o le Mafutaga a Tina, se'ia oo ina valaau iai lona Matai.

Sa avea ma sili'aga o le Mafutaga a Tina, aua e valaau iai lona Matai, ua toe o ia le tina matua o le Mafutaga. O ia o se tasi o tina na iai i le faavaeina o lenei aulotu i le amataga se'ia oo ina aami le

uluai faifeau a le aulotu i le aso 18 Aperila 1984. O se tina ua loa tausaga o feagai ma ni gasegase faigata, peitai sa le'i vaivai ai lona loto e faamaopoopo i le Ekalesia, e faalototele i tina talavou o le Mafutaga, e fautua malosi foi i le nofo a matafale galulue o le aulotu ina ia onosai ma tauivi e faamalosi i le atiina'eina o le galuega a le Atua. O se tina foi e to'aga i sauniga lotu i Aso Sa, se'i vagana ua gasegase pe alu malaga.

O le Aso Faraile 30 Me 2014 i le itula e 4pm na amata ai ona toe sauniga i le Maota Faasausau o Pa'u Sefo Pa'u i Ulumotootua, ma molimoli atu ai lona sa i Salua i Manono-uta mo leoleoga o le po, ma tofa ai i lona aiga. O le itula e 10am i le Aso Toonai 31 Me 2014 lona toe sauniga i le malumalu o le Ekalesia Faapotopotoga Kerisiano Samoa i Manono-uta.

O le faifeau o Maluelue Pone o le EFKS i Salua-tai na molimolia i totonu o le malumalu le sa o le tina mo ona toe sauniga ma saunia talosaga. O Silao Lilo (FK) na fofogaina le Afioga Paia a le Atua, o le faifeau o Iona Paniani o le EFKS i Hapai na saunia le upu faamafanafana, o a'u na taitai ma saunia le molimau faale-agaga, ma taitai i lona toe sauniga i le tuugamau.

Ona matou faamavae atu lea i le tina i le pese faamavae a le 'au Kerisiano - Talofa Uso e, Tofaina oe...

"Tuu mai ia te au ia ou alu atu i lo'u Matai. Aua lua te taofi ia te au, aua ua faamanuia mai e le Alii i la'u malaga; tuu mai ia te au ia ou alu atu i lou Matai": Kenese 24: 54. Manuia le malaga Ruta.

Rev. Napoleone Vaiaso FS
EFKS Manono-uta.

O E UA MALILIU

Avamua Mataletoelau Saleupolu

30 Tesema 1942-9 Ianuari 2015

Na soifua mai Avamua i leaso 30 Tesema 1942. Na valaau le Atua i le tama ia Avamua i le aso 9 Ianuari 2015. Ua 72 ona tausaga. Sa faaipopo atu ia Salafai o Malie ma e toa lima o la alo. Sa a'oa'oina i le aoga a le faifeau ma le a'oga tulagalua i Vailele. O le tausaga e 1986 na avea ai o ia ma A'oa'o Fesoasoani se'ia valaau lona Matai.

O se tama alofagia, o ona uiga

to'amalie ma loto maulalo. E tumu i le faaaloalo ma alofa, e pipii mau lona faatuatua i lona Atua, ma o ia lava o se tama mata'u i le Atua na faavae ai lona soifua tautua. O se tama na mataala i le tausiga o lana fanau, e faigaluega lelei uma.

Sa taitai le tama o le pulega ia Peteru Tone FT i ona toe sauniga. Sa molimolia mai lona sa i totonu mo lona toe sauniga e le Susuga Setu Samitioata FS. O le Tusi Paia na faitauina e Iupeli Ieremia FS, o talosaga o Enefatu Lesa FS, a o le lauga o Falenuu Tagataese FS. O molimau o le tina ia Salafai Avamua, fanau - Taki Avamua, Tau Avamua ma Junior Avamua, uso o le Afioga Samoa Mautoatasi, sui o le nuu - Afioga Sala Uili.

O taimi uma lava o a'u asiasiga, ou te naunau i lanafaasoa ma lana faalototele mai i le galuega. Ua ou mautinoa ai o le tama e mafuta i lona Atua i le tatalo. E mau i le Atua e faavae ai lona ola faatuatua. O se meaalofa mai le Atua mo tagata uma na silafia le tama.

Sa faaii i lona oliolisaga tumau i lona maota i Vailele.

Avamua, ia tafi mala lau faiga malaga ma ia maua lou nofoaga tumau i le malo i le lagi. Ulufale maia i le fiafia o lou Alii, ma ia fai mou tofi le malo ua saunia, sau mai le amataga o le lalolagi. Faafetai Avamua, tofa.

Siaosi. Salesulu FS.

EFKS Vailele.

Auapaau Ikenasio

26 Me 1933-20 Fepuari 2014

O le tiakono EFKS Manono-uta. Na soifua mai i le aso 26 Me 1933 ae faamanavaina e lona Matai mai i ana fe'au i le aso 20 Fepuari 2014.

Na faa-ekalesiaina ma lona tausi o Mekala i le aso 5 Oketopa 1986. Na faaofia i le tofi tiakono i le aso 22 Tesema 2011.

O le aso 27 Fepuari 2014 i le itula e 6am na amataina ai ona toe sauniga i le Maota Faasausau o Pa'u Sefo Pa'u i Motootua, ona matou malaga ai loa lea i Salua i Manono-Uta e molimoli lona tino maliu i lona aiga, e faatali ai mo ona toe sauniga.

O se tama e le'i leva ona avea ma tiakono, peitai o se auauna sa tuuina atoa lona malosi ma lona soifua i lana auaunaga, e ui sa aafia tele foi lona soifua i ma'i o le tino. O le auauna e loto maulalo ma agamalu.

O le itula e 10am na faataunuaina ai ona toe sauniga i le malumalu o le Ekalesia

Faapotopotoga Kerisiano i Manono-Uta. O a'u sa ou taitai ma saunia le molimau faale-agaga. O le Susuga ia Maluelue Pone FS, na molia le sa o le tiakono i le malumalu mo ona sauniga ma saunia talosaga. O le Susuga ia Ioane Tauilili (Tiakono Katoliko Roma) na saunia le upu faamafanafana. Sa ou taitai i lona sauniga i le tuugamau, ma matou faatofa i le auauna i le pese faatofa a le "Au Kerisiano - Pese ma Viiga

268.

Na ou faalogo foi i le leo mai le lagi, ua faapea mai ia te au, "Ia e tusi: "Amuia e ua oti, o e ua oti oi le Alii e amata i nei ona po." O lea lava ua fetalai mai ai le Agaga, ina ia latou malolo i a latou galuega e mulimuli ia te'i latou. Faaaliga 14:13.

Ia manuia lau malaga.

Rev. Napoleone Vaiaso FS.

EFKS Manono-Uta.

Sau e Vaai iai? Come and See!

mai le itulau e 12

o le malamalama na tutuina e uluai maturo o le Tala Lelei ia Keriso, e le'i mafai e le malosi o Roma ma isi malo ona latou faapogisaina. Come and see. Sau iai e te matamata!

O mai e vaavaai iai, i mea ua faia e Keriso mo le lalolagi ma ona tagata. O le alofa atu i le lua te tuaoi e pei o oe lava ia te oe, ae le o le tapu'eina ma ave faatagata o taua, ma vavaeseina ulu ona o i

latou o soo o Keriso.

O mai e molimauina le fatupese ma le faifaaili ta'uta'ua o Handel a o maligi ona loimata a o ia fatuina le pese ia Keriso: *The Messiah!*

O mai e molimauina le sauaina o Kerisiano i atunuu o Irak ma Suria ma Aikupito ma isi atunuu i Sasae Tutotonu. Come and see!

O mai i Samoa i le pogisa sa fefulituaa'i ai le atunuu, a ua suluiia e le malamalama talu ona taunuu le Tala Lelei i Mataniu Feagai ma le Ata. O mai e matamata i le tuugamau ua tuufua, ua toe tu le Keriso, ua mae'a ona tapena o lou Faaolataga. O mai e matamata!

O ATA O E UA MALILIU




**Faimasasa
Lemalama**




**Vaitimu Ruta
Mulipola Pologa**



**Lalau Osimoni
Tauasi**



**Lepou Siasau Pule
Samasoni**



**Avamua
Mataletoelau
Saleupolu**



**Auapaau
Ikenasio**

O le Tamameamea

O le tamameamea o le faatinoina lea o le finagalo o le Atua ina ia tupu olaola le fanau a tagata. E leai se fiafia e sili atu i lo le fiafia o se ulugalii ina ua fanau mai sa la tama.

E ta'oto'oto ma matamata i le tamaitiiti na maua mai o la tino. E milimili le ulu, faitau tamatama'ilima, talanoa pe foliga ia ai; fai mai le fafine e soo le pepe i lona tama, ae fai mai le tamaloa leai e soo le pepe i lona tina.

A o lenei lava e tau pulapula mai le tamameamea, na te le iloa le alofa o

ona matua na maua ai o ia, ma lea ua matamata ma le fiafia i le mealofa ua la maua mai le Atua.

Fai mai le Salamo 139: 16: "Na silasila mai ou fofoga i o'u tino uma ina o afuafua; ua tusia foi uma lava i lau tusi, o ona aso foi na faia ai, a o leai ni o'u tino."

Salamo 139: 14: "Ou te vivii atu ia te oe, aua na faia a'u e ala ai ona matautia ma ofo tele ai; o mea na e faia o mea mamana ia; ua ou matua iloa e a'u nei mea; e le lilo lo'u tino ia

te oe, ina ua faia a'u i le mea lilo, ina ua saunia au i mea loloto i le lalolagi."

O le fesili: Aisea tatou te soona sauva ai i le mealofa mai le Atua? Aisea e te soona sauva ai i le na fanau mai ai le mealofa mai le Atua? Aisea e te fasi faamo'amo'a ai le tina o lau fanau? Ma'imau pe ana tumau pea le ta'oto'oto ma matamata! Matamata ma maofa i le tagata ola na foa'i mai e le Atua. Matamata ma maofa i le mana na fai ai, ma fanau mai, ma oo ina tagata matua. E moni lava: "...." o mea na e faia o mea mamana ia...." Faafetai i le Atua ua ia faaaogaina oulua e ala mai ai lana mealofa.